

REGIONAL NEWS

HEADLINES:-

1. Vawiin YMA Day hlim leh lawm taka hman a ni.
2. Central YMA President Pu Lalhmachhuana'n Zohnahthlakte tan YMA chu a ding zel dawn a, a tlan chhe dawn lo, a ti.
3. Prime Minister Narendra Modi-a chuan G7 Summit-ah India hmathlir khawvel hmaah a pholang a ti
4. Ukraine-a remna siam hna thawh dan turin ngaihtuahin vawiin khan Switzerland-ah ram 100 chuang atangin hruaitute an kalkhawm.

<><><>

YMA DAY

Mizorama tlawmngai pawl lian ber YMA ni, YMA Day vawi 89-na vawiinah YMA Branch hrang hrangin mahni remchan dan anga hun hman dan tur siamin hlim leh uar takin an hmang.

Zing kar atangin branch hrang hrangin mahni veng chung tifaiin hnatlang an thawk a; Central YMA chuan he ni pual hian Damdawi in leh Home hrang hrangah chibai bukna an lo hlan kual tawh a. Aizawl leh a chhehvelah sawrkar leh Kohhran Damdawi inah Cheng 15,000 theuh an hlan a, Home pathum ah buhfai an hlan bawk a. Heng bakah hian ram chhunga state hrang hranga Mizo Welfare 16 hnenah Cheng 15,000 theuh an hlan bawk.

Chief Minister Pu Lalduhoma pawhin vawiin khan Biате Branch YMA-in YMA Day an lawmna, Zialung Community Hall-ah a hmanpui a. Chief Minister chuan khawtlang nunah chona a tam hle tih sawiin khaw tin leh veng tin branch YMA ten mahni zawnah theihtawp chhuaha an beih let loh chuan ram leh hnam tichhe thei thil an ni, a ti a. Tui leh leilung enkawl danah insiamthat a ngai a, nun thlahdah vanga naupang taka thihna te, nupa inthenna te, HIV/AIDS te, Cancer te a tam hle a, ruk ruk a hluarin, thalai vakrawlai an tam tual tual tih a sawi a. Pi leh pute atanga Mizo te'n an neih, zo nun ze mawi te a boral nasa tih sawiin din thar leh turin mipui a sawm a ni.

Vawiin YMA Day thilpek atan ITI Veng Branch YMA chuan an veng mi Pi Lalduhawmi in an sak thatsak a. Vawiin khan an in sak thatsak hi Central YMA President Pu Lalhmachhuana'n a hawng a ni.

Mamit District-ah pawh YMA Day member ten hlim takin an hmang hlawm a. YMA Day pual hian Sub-Hqrs YMA Mamit chuan hmun hrang hrangah thilpek a pe chhuak a ni.

Saitual khawpuia YMA Branch 9 te pawhin vawiin YMA Day kha uar takin an hmang a. Branch hrang hrang hman dan a inang lo va, vantlang tana thil tha tih nan te, midang tanpuina ni atan te, intihsiakna leh intihhlimna lam hawia hman te a ni hlawm a, tlai lama ruai nena lawm branch a tam zawk an ni a, zanin thlenga programme hmang tur an awm bawk.

Nizan atang khan Champhai District-a YMA Branch thenkhat chuan YMA Day vawi 89-na lawmna hun an hmang tan tawh a; Champhai Sub-Hqrs. YMA hruaitute chu hmun hrang hrangah insem darhin YMA Day lawmna an hmanpui a. Nimin khan Champhai Sub-Hqrs. YMA hruaitute chuan rilru leh taksa lama harsatna neite dahkhawmna Home hrang hrang, Jail leh District Hospital a awm te hnenah YMA Day pualin tangkafai Cheng 32,000 an hlan a ni.

AH & Vety.Minister Pu C. Lalsawivunga chuan East Tuipui biala Vaphai khuaah YMA Day a hmanpui a. Adviser to Chief Minister Pu TBC Lalvenchhunga, Aizawl West-1 MLA chuan Champhai District-a Kelkang khuaah YMA Day lawmna hi a hmanpui.

Kolasib khaw chhunga YMA Branch 21 te pawhin YMA Day urhsun leh hlim takin an hmang a. Branch tam zawk chuan zing karah veng chung thenfai hnatlang thawkin Branch thenkhat chuan thing tiak an phun .

Tukthuan eikhamah Branch tam zawk chuan YMA Day pual infiamna leh intihsiakna te neiin, Section YMA intihsiakna an nei a, Branch thenkhat chuan Kumpulan thupui 'Ram leh Hnam humhalh' tih hmangin thusawi an ngaitla.

Kolasib Sub-Hqrs YMA Office Bearer te chuan chuan nimin khan YMA Day pualin Kolasib-a Hospital pahnih leh Home pathumah tanpuina pawisa faiCheng 3,000 theuh an hlan.

Serlui bialtu MLA Pu Lalrinsanga Ralte chuan Vairengte Jt.YMA buatsaih YMA Day vawi 89-na chu Vairengte Branch YMA 10-in a huhua Jt. YMA Field-a an hman a hmanpui.

YMA Day lawmna hi vawiina ruah sur tam avangin tum anga kalpui thei lo an awm nual bawk a ni.

<><><>

CENTRAL YMA PRESIDENT

Central YMA President Pu Lalhmachhuana'n YMA member zawng zawngte leh Zohnahthlak unau zawng zawngte YMA Day Chibai bukin YMA chu pawl ropui tak leh thianghlim a nih ang ngeiin YMA-ah theihtawp chhuaha tan la thar leh turin YMA member zawng zawngte a chah.

Vawiin YMA Day puala Akashvani palaiin a kawmnaah CYMA President chuan YMA chuan a bul tantute atanga tun thlengin hma a la sawn zel a, YMA member Nuai 4 Sang 9 leh 601 an awm mek te, Group YMA 50, Sub Headquarters 8 leh Branch 821 a awm ta chu a bul tantute, YMA hruaitute leh member, veng tin leh khaw tina tanlatute avang a ni, a ti a. YMA chu tlawmngai pawl, politics rawngkai lo a nih ang ngeiin a thil tum leh a thu vawn te chu vawiin YMA Day-ah hian YMA member ten an chian thar leh a ngai, a ti a. Kumtluana YMA member-te'n tanpui ngaite tanpuia rim taka an thawh thin laia sorkarin a bika YMA Day meuh a puang chu sorkar chungah a lawm thu a sawi a. YMA Day-ah hian Mizo nihna angin mahni thenawm khawvengah harsatna tawk leh tanpui ngai an awm leh awm loh dap chhuaka tanpui ngaite tanpui turin mi tin a sawm a ni.

Ram leh hnam humhalh tura YMA-in theihtawp a chhuah thin thu pawh sawiin Central YMA President chuan ruihhlo leh سوالنا hrang hrang dona kawngah te, abikin thalaite'n nun kawng dik lo an zawh tur vennaah te YMA chuan nasa takin hma a la thin a, tha thlah lovin theihtawp a chhuah zel dawn, a ti a. Sual dona kawnga thawhpui tur mimal leh pawl an awm a nih chuan YMA-in thawhpui theih loh a nei lova, rm leh hnam thatna atan chuan ken an pen zel dawn, a ti a. Hma an lak tawhna zawng zawnga tha thawhtu mimal leh Branch hrang hrangte chungah lawmthu a sawi a ni.

YMA-ah Zohnahthlak zawng zawng an leng vek a; Central YMA chuan Inpui an nih inhriain hnam peng hrang hrangte tan YMA Kawngkapui chu a inhawng reng a, pawl leh chi bing anga inlak hran tha an ti ngai lo, Central YMA President chuan a ti a. Tun hnaia Manipur leh Myanmar-a Zohnahthlak harsatna tawkte YMA-in a theih ang anga lo tuamhlawma an lo tanpui tawh thin thu pawh sawiin, hma lam hunah harsatna a lo thleng a nih pawhin YMA chu a tlanche ngai dawn lova, Zohnahthlakte tan a ding reng dawn a, Zofate INpui a nihna hi a vawng nung reng dawn a ni, a ti.

Ruihhlo bakah tunlai khawvel changkannain a ken tel thiamna leh khawthlang nunphung te'n Mizo thalaite a nuai mek lai hian Mizo takin a changkan theih a, Mizo takin ropui theih tih sawiin Pu Lalhmachhuana chuan Mizo nun ze mawi vawng nung turin Mizo thalaite leh mipui a chah a. Vawiin YMA Day-ah hian damdawi ina awm mek te, do hneh loh neih vanga khung hran ngei te leh Mizoram pawna zohnahthlakte tan YMA chuan chhawmdawlina pein a luang chhuak mek tih pawh sawiin Central YMA President chuan YMA chuan a kuangkua thui zel dawn a ni, a ti.

<><><>

IGP

Mizoram IGP Pu Lalbiakthanga Khiangte chuan ramchhunga hman tur hnuchhuina atana dan zam thar duan criminal law pathum hmang turin Mizoram Police te an inpeih fel tawh tih a sawi.

Pu Lalbiakthanga Khiangte chuan criminal law pathum sorkar laipuiin a duan tharte chu July ni 1 atanga Mizoram Police ten an hman ve theih nan nasa taka an inbuatsaih thu a sawi a, Mizoram Police-te training pe turin NCRB atanga trainer an chah chhuah thu leh District hrang hranga Police Officer-te chu training an lo pek lawk tawh thu leh training pe thei tur mi 100 chuang an neih tawh thu a sawi a, Mizoram Police za a 93 te chu Criminal Law duan thar chungchangah training an in pek vek tawh thu a sawi.

Inspector General of Police chuan dan thar hnuaiiah FIR pawh online hmanga thawn leh dawn theih a nih tawh tur thu sawiin online a case register thei tur Mizoram District 11 atangin Police 148-te zirtirna an pek tawh thu a sawi a. Dan tharah mipui humhimna tam zawk ruahman ani tih sawiin mi tin ten ngaihven a, dan hnuaiiah mahni himna tur leh tihsual theih ang te hrechiang turin a chah bawk.

<><><>

AMC MAYOR/ SAVE THE RIPARIANS

Aizawl Mayor Pu Lalrinenga Sailo chuan Aizawl khawpui tifa turin khua a la tlai lo, a ti.

Vawiin YMA Day puala faina hnatlangpui, Republic Veng Local Council, Branch YMA leh Save the Riparian te'n an thawhnaah he thu hi sawiin Pu Lalrinenga Sailo chuan Mizo te'n septic tank thli paih dan leh bawlhhlawh paih danah hma an sawn a tul hle, a ti a; hnatlang tura kalkhawmte chu midang tana entawntlaka insiam turin a chah a ni.

Save the Riparians hian tun hnaiah luikawr leh lui kam tihfaina kawngah hma a la nasa hle a. Frontline Leader Romalsawma chuan a hmun hrehawm lai kal hrehawm lai pawh ni se Save the Riparians-in hma an hruai zel ang, tiin a sawi a. Republic Veng nena thawhhona hun tha a awm chu lawmawm a tih thu a sawi bawk.

Save the Riparians hian Aizawl khawpui chung tihfai hna an thawk mek a. Thawh khatnaah Model Veng leh Mission Vengthlang inkar lui an tifa a, March ni 26 khan thawk tanin ni 20 chung hun an hmang a. May ni 1 khan Thawh hnihna an tan leh a, Khatla atangin an tan a, Ebenezer Hospital an thleng tawh a ni.

<><><>

KHAWZAWL KAWNAR YMA GOLDEN JUBILEE

Vawiin khan Khawzawl Kawnar YMA chuan an Branch Golden Jubilee an veng YMA hall-ah an lawm a, Deputy Govt Chief Whip, Tuichang bialtu MLA Pu W. Chhuanawma'n a hmanpui.

Pu W. Chhuanawma chuan kalkhawm thalaite chu hmasawn a pawimawh zia hre thar tura a duh thu sawiin, tui tling reng, luang chhuak lo chu a tenawm thuai thin ang bawkin nihna ngaia mi a awm reng chu thil tha lo tak a ni, a ti. Hmasawn tur chuan hun awl hman that leh hman dik a ngai a, mi tinin hun thuhmun darkar 24 theuh an nei a, chu hun hmang thiam te chuan malsawmna an dawng mai thin, a ti.

Jubilee Lawmna programme-ah hian YMA hruaitu hluite chawimawina hun hman a ni a. Zai leh hnam lam te ngaithlaa en a ni a. Tlaih Jubilee lawmna ruai thehin zanin hian Jubilee Concert an nei chhonzawm a ni.

<><><>

PM @ G7

Prime Minister Narendra Modia chuan G7 Summit-ah India hmathlir khawvel hmaah a pholang a ti. Ni hnih chama Italy-a G7 Summit a hman zawhin vawiin khan PM Modia hian New Delhi a lo let leh a. Social Media-a a thudahah G7 Summit chu hun pawimawh tak a nih thu sawiin an thu ngaihtuahten rah tha tak a chhuah dawn a ti a. Khawvel ram hrang hrang hruaituten thu pawimawh tak tak sawiho thu sawiin an thurelten khawvel tana thil tha a thlen a beisei a ti a. Chhuan lo awm zel turte tan khawvel tha zawk siam anih ngei a beisei thu a sawi bawk.

Prime Minister Narendra Modia hian G7 Summit karlakah ram hrang hrang hruaitute a kawm a. Italy Prime Minister Giorgia Meloni, French President Emmanuel Macron, UK PM Rishi leh Ukrainian President Volodymyr Zelenskyy te a kawm bawk a ni.

Puan tawh angina G7 Summit hi Italy a Apulia khuaah ni hnih chung neih a ni a. Prime Minister pawh sawm anih angina a tel ve a, Outreach Programme ah telin khawvel chhim lam ram Global South te ngaih pawimawh a tul zia uar takin a sawi a. India-in G20 President chanvo a chelh laia African Union-te member atana lakluh an ni chu chhuanawm a tih thu a sawi bawk a ni.

Tun tum hi a term thumna atana Prime Minister anih leh hnua Prime Minister Modi-an ram pawn a tlawh hmasak ber a ni.

<><><>

8 MAOIST KILLED IN CHHATISGARH

Chhatisgarh-ah vawiin khan Maoist hel 8 kahlum an ni. Thudawn danin inkahna hmun hi Bastar division-a Abujmad-ah niin security force pahnihin hliam an tuar bawk a ni. ITBP, District Reserve Gaurd leh Special Task Force tangruat chuan an thudawn bawhzuiin helai bialah hian Maoist dapchhuah beihpui an thlak a. Tukin khan Maoist te nen hian intawngin an inkap chhunzawm ta a ni.

<><><>

UKRAINE

Ukraine-a remna siam hna thawh dan turin ngaihtuahin vawiin khan Switzerland-ah ram 100 chuang atangin hruaitute an kalkhawm a. He hunah hian Ukraine-a remna a awm theih nan te, Ukraine atanga buhfai thawchhuah chungchangte, Russia-in a awp mek Zaporizhzhya nuclear power plant leh mihring harsatna tawkte chhawmdawlina tur chungchang bakah mi tang inthleng dan turte an sawiho a ni.

He inhmukhawma tel zingah hian UK Prime Minister Rishi Sunak, French President Emmanuel Macron, German Chancellor Olaf Scholz, US Vice President Kamala Harris, Japanese Prime Minister Fumio Kishida, leh Canadian Prime Minister Justin Trudeau te an awm a ni.

<><><>